

## Kameradschafte, Freundschafte

In su Zeide wie heitzedaach dut merr gern zuriggenke, nitt nor onn die Zeide ohne Kriesch, naa, aach onn die eischene Kinner- unn Juuchendzeit. Unn wenn merr donn mett oom vunn soine ahle Kummbeern – ahle im Sinn vunn alt odder long her – babbele odder telefoniern dut, kimmt merr gern uffs Johr Neunzehhunnerd-vierunnfuffzisch, doo sinn merr nemlich Kerweborsch gewese, mett sechsisch Monn, all aus unserm Johrgong Neunzehhunnerdfunndreißisch.

No ja, doo werdd joo ewe driwwer dischpedierd, obs nitt enn Kerweverein gewwe soll odder nitt, weil nimmi su vill junge Leit als Kerweborsch ze gewinne sinn, obwohls in de letzde Johnn su war, dasses mieh Kerwemädscher wie Kerweborsch gewwe hott. Doodemett gieht awwer dess verlorn, vunn dem isch grad verzehle will, nemlich dasses in unserm Kerweborschjohrgong heit noch su enn gude Sesommehalt gewwe dut, dass merr bei ner Jubiläumsfeier noch immer iwwer sechzig Leit, also Männer unn Fraue, sesommekrieh. Unn ess iss aach su, dass wenn ooner vunn de Kamera-de gestorwe iss, dem soi Witwe in de Kameradschaft 35 bleiwe dut. Uff de onner Seit sinn, seitdem merr unsern Finfunnzwonnsichsde Gebortsdaach gefeiert hawwe, aach die 35er Mädscher, no ja die Fraue aus unserm Johrgong, beim Feiern immer mett debei.

In dem Wort „Kameradschaft 1935“ stiggd joo nitt nor de Johrgong droi, aach de Sesommehalt unnernonner iss doodemett ausgedriggd, awwer nitt unbedingt dess Wort „Freundschaft“. Weil bei sechsisch Kamerade konnt merr nitt neununnfuffzisch Freunde hawwe, awwer su finf odder sechs sinns bei mir doch gewese. Nor vunn dene dut koon oone mieh lewe unn dess iss schad, weil Freunde dut merr brauche, die sinn dorsch Bekonnde nitt ze ersetze.

„Freundschaft ist ein hohes Gut“ hott emol ooner gesaad unn der Monn hott Recht. Weil emm gude Freund konn merr monsches verzehle unn merr krieh vunn emm gude Freund aach monsches verzehld, wasser noch nitt emol soiner Fraa verzehle will. Koo grüße Sache, awwer isch waaß dess vunn mir: Merr verzehld emm Freund schunn emol vunn soine Niederlaache, die merr im Lauf vunn soim Lewe erlidde hott, wenischer vunn soine Erfolche, weil der die schunn long kenne dut. Unn wenn merr mett emm Freund alloo iss konn merr dem aach emol saache, was oom onn ihm nitt gefälld. Unn enn gude Freund iss doodriwwer aach nitt oigeschnappd.

Eiern Honnes